

## Die junge Leit von heit

Om Freidaach von de vorsch Woch hawwe merr unne om Moo uffere Bonk gesotze, de Karl, de Schorsch unn ich. Mir hatte unser Kappe uff, weils doch so warm war, unn hawwe uffs Wasser geguckt. Dess mache merr immer so, wenn merr nit wisse, was merr babbele solle unn aach die Hitz hatt uns e bisje mettgenomme.

Uff oomol sacht de Karl: Ich verstehse nit.

Ei wen verstehsde nit, Karl, hott de Schorsch gefroocht.

De Karl hebt soi Kapp hoch unn kratzt sich om Kopp: Ich verstehse nit, die junge Leit von heit.

Ich guck de Karl oo unn sach: Was issen mett de junge Leit, Karl?

De Karl druff: Die sinn so frech, die hawwe koon Oostond mehr unn aach koon Respekt mehr vor uns Alte.

Doo moont de Schorsch: Wie hosden dess gemerkt, Karl? Erzehl emol,

Fahr ich doch gesdern mettem Audo de Wickerer Bersch enunner, doo iwwerholt mich so en Golf mett zwaa junge Kerle drin, die sinn mett mindestens neunzig Sache nooch Flerschem enoigefahrn unn de Fahrer hott noch mettem Handy telefoniert. Vorne on de Kreuzung war die Ombel rot, doo musst de Golf warte unn ich stell mich dehinner. Es wird grie, doch dess Audo vor mir beweecht sich nit, weil de Fahrer immer noch telefoniert.

Ich drick uff die Hup, weil der merke soll dass Grie iss, doo reißt der Rotzbub die Fahredier uff unn kreischt: Zuerst kriechst du den Berg hinunter und jetzt hast du's auf einmal eilig – Blödmann! unn schmeißt soi Dier widder zu.

Ich denk, mett mir Alte konnsdes joo mache unn brummel: Fahr endlich los! - awwer Peifedeckel: Der fährt immer noch nit, wart, bis-ses Gelb werd, fährt los, dass die Reife quietsche unn lässt mich, weil gleich Rot worrn iss, mett moine Wut vor de Ombel steh.

Doo schittelt de Schorsch soin Kopp unn sacht: Ei so ebbes!

Jaa, jaa, hott de Karl geschennt, doo kennsde die Kerle doch verrobbe. Awwer ich kann eich noch e Stickche verzehle. Doo hadde merr doch in Risselsem soo e Besichdichung mache wolle, so mett bald zwonzig Persone unn alles äldere Leit, unn sinn mettem Bus eniwwer gefahrn. Mir warn e bisje luschich unn wie de Bus iwwer die Brick gefahrn iss, hawwe merr gesunge: Muss i denn, muss i denn zum Städele hinaus ... De Fahrer hott gelacht, awwer so en junge Kerl hott zimmlich bees geguckt. Korz vor de erst Haltestell geht der freche Bongert on die Dier, unn grad als de Bus hält unn die Dier uffgeht, guckt der uns oo unn fängt oo ze singe: Kukident, Kukident zum Städele hinaus ... unn fort warer.

Doo habb ich moi Zäh gebleckt unn de Schorsch hott soi strahlensdes Lächele uffgesetzt unn hott gesacht: Ei so ebbes!

Unn dann hawwe merr unser Kappe e bisje mehr ins Gesicht ge-  
zooche, hawwe widder uffs Wasser geguckt unn hawwe uns so un-  
ser Gedonke gemacht iwwer die junge Leit von heit. Unn ich habb  
gedenkt, dasses schunn long her iss, dass mir, de Karl, de Schorsch  
unn ich, so jung unn so frech warn – nor dass merr doomols noch  
koo Audo hadde.

Eiern Honnes